

Jeglechi Entscheidig (Melodie Alls wo mir i d Finger chunnt, Mani Matter)

Am Tag wo eine z China für sis Znacht beschlosse het
Dass är hüt gärn e Flädermuus zu sim Risotto hätt
Het är dr Wält e folgeschwäre Schicksalsschlag beschehrt
Jeglechi Entscheidig isch für öpper gäng verchehrt

Am nächschte Tag het är no Räschte mit i d Bude gno
U so isch o si Bruefskolleg no zum ne Zmittag cho
Bim Karaoke hei si när zwöi Meitschi kenneglehrt
Jeglechi Entscheidig isch für öpper gäng verchehrt

Är het du plötzlech Fieber u chli Müeh mit schnufe gha
So blibt ihm nume hurti uf ne Bsuech zum Dokter z ga
U zu däm Zytpunkt het ihm niemer e Kontakt verwehrt
Jeglechi Entscheidig isch für öpper gäng verchehrt

Mir hei ir Zytig gläse was in China isch passiert
Doch wüll das wyt ewäg isch hets is nid so intressiert
Was kümmeret das üs wenn alli müesse hueschte dert
Jeglechi Entscheidig isch für öpper gäng verchehrt

U plötzlech hei mir COVID nümme chönne ignoriere
Es het is eine müesse dür di erschti Wälle führe
Hurra ke Schuel, derfür hets mängi chlini Bude gchehrt
Jeglechi Entscheidig isch für öpper gäng verchehrt

Es het Demonstratione gä d Bevölkerig isch gspalte
S git die wo folge u die wo sech gar a nüt wei halte
Es hätts e jede besser gwüsst u rundum all belehrt
Jeglechi Entscheidig isch für öpper gäng verchehrt

Vo Ängland u Südafrika da chöme Mutatione
Es wär villich dr Zytpunkt wo ne Impfig sich würd lohne
Nur hei mir gäg so Schnällschüss doch e gsungi Skepsis glehrt
Jeglechi Entscheidig isch für öpper gäng verchehrt

I gloube i entscheide mi itz für das Lied z beände
I weiss no nid was alls no chunnt drum lahnis la bewände
S cha si dir hättet gärn di Gschicht no e chli witer ghört
Jeglechi Entscheidig isch für öpper gäng verchehrt

